

Directiva nobo di Aruba Lions Club, presidi pa Lion Bibi Arends

ORANJESTAD - Den un ceremonia sumamente placentero, diadomingo merdia, e directiva nobo di Aruba Lions Club pa e aña leonistico 2017-2018, a keda instala. Presidente eligi ta Lion Bibi Arends.

Vice presidente: Lion Ivan Croes, Secretario: Lion Randolph Vrolijk, Tesorero: Lady Lion Gabriela Kock, Director Comitiva di Miembro: Lion Gerardo Figaroa, Director pa 2 aña: Lion Anthony Roccini, Director pa 1 aña: Lady Lion Magaly Franken y Leo Adviser: Lion Igor Croes. Lion Francis Leo a tumu e funcion di Lion Tamer y Tail Twister, y tambe a fungi como Maestro di Ceremonia. Invitadonan special tabata e President di Lions Club Curaçao, Lady Lion Claudia Prodan y e president di Bonaire Lions Club, Lion Marlon Bermudez.

Durante e weekend pasa caba president di Aruba Lions Club cu su First Lady Lioness Vanessa a biaha y a participa na e ceremonia di instalacion di tur e dos club nan aki. Varios miembro di Aruba Lions Club a bin den compania di nan yiu y familiar nan. Life Member Lion Maiky Croes tabata encarga cu e destitucion di e directiva saliente y instalacion di e directiva nobo. Tambe el a haci entrega di plakkaat nan di merito na: Lady Lion Magaly cu exitosamente a maneha e administracion di e Club su reciente Rifa di Cas. Na Lion Carlos Maduro cu a bende mas hopi (106) buki di e Rifa di e Cas. Y "last but not least", un plakkaat a wordo otorga pa un di Aruba Lions Club su ehemplar ex Leo, Roderick Tapia, cu ya ta bon conoci, di a caba su VWO na Colegio cu e puntacionnan di mas halto entre su colega alumno nan.

Den su discurso na final di e ceremonia, President Lion Bibi Arends, cu na 2004-2005 tabata tin e encargo di president caba, a splica cu na 2009 cu el a bay cu pensioen, tambe el a dicidi di bay menos activo cu su actividadnan den Lions Club. Sinembargo 2 aña pasa, a dicidi di bolbe bira activo y a reintegra su mes den directiva, eherciendole e funcion nan di president di e comitiva nan di: Monumento y Edificio, Miembresia, Cama di hospital y Rolstoel, y finalmente Vice Presidente.

Finalmente Lion President Bibi a gradici e directiva saliente cu nan tremendo trabao y a priminti tur presente cu maske cu e aña aki Aruba Lions Club ta celebra 70 aña ta sirbi nos comunidad y Lions Club International ta celebrando 100 aña di existencia, e lo dedica su aña principalmente na nos ancianonan, cu den su experiencia den su maneho di cama di hospital y rolstoel, ta falta masha hopi atencion di nos autoridadnan ariba tereno medico, social, financiero y cuida general. E ta enfatisa cu nos comunidad

mester bira mas consciente cu nos grandi nan (anciano nan) cu tabata e creador nan di e dushi Aruba cu nos ta disfrutando di dje awe, mester mas reconocimiento y atencion.

Lion Bibi a recorda tur presente cu ta awo nos ta drentando e pik di "vergrijzing" aki na Aruba, y cu nos tambe ta bay yega e edadnan ey. Pues si nos yuda drecha nan situacion nan, na final di dia, nos mes lo bay tin beneficio di esaki nan.

